



30. juli 2020

UKA2020/131

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumu-una saqqummiuppara:

**Innarluutilinnik sullissisutut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittussamik ataavartussamik Naalakkersuisut periusissiorlutillu iliuusissatut pilersaarusiornissaannut piumasaqarfigineqarnissaat pillugu Inatsisartut aalajangiiffigisassaattut siunnersuut. Periusissiami iliuusissatullu pilersaarummi suliniutaasut anguniagassatut allassimasunut naapertuunnersut piffisap ingerlanerani nalilersuisarnissaq ilaassaaq. Periusissiatut iliuusissatullu pilersaarut saqqummiunneqassaaq kingusinnerpaamik UKA2021-mi.**

(Inatsisartunut ilaasortaq Sofia Geisler, Inuit Ataqatigiit)

### **Tungavilersuut:**

Inatsisartut 2014-imi akuersissutigaat Naalakkersuisut 2015-imi upernaakkut ataatsimiinnermi periusissamik iliuusissatullu pilersaarummik saqqummiussissasut, innarluutilinnik sullissisutut atorfillit ilinniagaqarnissamut, ingerlaqqiffiusumik ilinniagaqarnissamut pikkorissarnissanullu pisariaqartitsinermik naammassinnittumik ataavartussamik<sup>1</sup>. Ilisimasalli naapertorlugit Naalakkersuisut periusissamik iliuusissatullu pilersaarummik suliaqarsimangillat, ukioq taanna qinersisoqarnissaata aalajangiunneqarnissaa sioqqullugu.

Periusissiamilli iliuusissatullu pilersaarusiamik taamaattumik pisariaqartitsineq ullumikkut minnerulersimangilaq, 2014-imut naleqqiullugu.

Kommunini aammalu ulloq unnuarlu paaqqinnittarfinni innarluutilinnik sullissivinni pikkorissunik sulisoqarniarneq taakkulu suliffinniitiinnarniarnissaat suli ullumimut ajornartorsiutaavoq. Pisariaqartat tamakkerlugit sulisoqarnissamut ilinniartinneqartartut ikippallaarput, ullumikkullu sulisooreersut akornanni taamatut suliamik ilinniagaqanngitsut amerlanerupput. Suliamik ilinniagaqanngitsuinnaanngitsut, aammali ilinniagaqarsimasut piginnaasatigut qaffassarneqarnissarneqarnissaq pisariaqarnissaq pisariaqartissavaat, soorlu assersuutigalugit perorsaasutut isumaginninnikkullu siunnersuisutut ilinniartitaanerit ingerlanerini innarluutilinnut tungasunik atuartitsineq sivikitsuinnarmik sammisaq pillugu ilisarititsinertaqartarmat.

---

<sup>1</sup> FM2014/111

Ilaqtariinnermut Naalackersuisoqarfiup aammalu Ilinniartitaanermut, Kulitooreqarnermut Ilageeqarnermullu Naalackersuisoqarfiup innerluutilinnik sullissisut ilinniartitaanerisa qaaffassarnissaannik suliniutaat akuersaarpara<sup>2</sup>.

Taamaakkaluartorli periusissiaqannginneq iliuusissatullu pilersaarussiaqannginneq anguniakkat iliuutsillu imminnut ataqatigiikkunnaarnerannik kinguneqarsinnaanera ernumanartoqartippaat. Periusissiaqannginneq iliuusissatullu pilersaarussiaqannginneq taamatuttaaq ataatsimoorussamik ataavartumillu anguniakkat sanilliullugit suliniutinik nalilersuisinnaanissamut annertuumik ajornartorsiortitsisarpoq.

Sulisut suliamik ilinniagaqarsimasut ilinniagaqanngitsullu, inunnik innarluutilinnik najugaqatigiiffinniittunik, ornittakkanik, ulloq unnuarlu paaqqinnittarfinnik aammalu utoqqaat illuiniittunik sullissisut pikkorissarnissamut pisariaqartinneqartariaqarput. Innarluutillit aammalu inuiaqatigiit ataatsimut isigalugit assigiinngisitaarneq annertunerujartuinnarmat sulisut ilisimasamik tuniorarneqartuarnissaat pisariaqarpoq, tamatumuuna innarluutinik assigiinngitsorpasuarunik nalaatsinissaminnut nukissaqarnerulerniassammata.

Perorsaasunik ilinniarsimasunik amigaateqarnerujussuaq, taamatullu aamma isumaginninnerup iluani ilinniarsimasunik amigaateqarneq, ajornartorsiutaapput naluneqanngilluartut. Suliamik ilinniagaqarsimasunik pisariaqartitatsinni atorfinitsitassaqaanngikkutta, qulakkeerniagassaraarput inuit innarluutillit sapinngisaminnik ajunnginnerpaamik pineqarnissaat. Ullumikkut inuppassuit suliamik ilinniagaqarsimannngitsut atorneqarput, tamannalu immi ajunngilaq illersugassaraagullu. Nalunngilarpulli suliamut tunngasumik ilisimasaqannginneq inuit innarluutillit siunertarinngisamik pineqartoorinnaanerannik pilersitsisarpoq, tamannalu iliuuseqarfigineqartariaqartoq.

Periusissiaq iliuusissatullu pilersaarussiaq, siunissaq eqqarsaatigalugu sulisut ilinniartitaanerinnik, ingerlaqqiffiusumik ilinniarnernik pikkorissarnernillu pisariaqartitatta qanoq anguneqarsinnaanerinnik tikkuussisoq, suliniutit suunerinnik erseqqinnerulersitsissaaq, inuillu innarluutillit sullinneqarnerannut aqutissiuussissalluni. Naatsorsuutigineqarporlu periusissiaq iliuusissatullu pilersaarut aamma nalilersuinertaqassasoq, tamakkulu suleriaqanngissami qanoq atorneqarsinnaanerannik nassuiaatitaqarluni.

### **Pisortanut aningaasatigut allaffissornikkullu kingunerisassai:**

Periusissiorneq iliuusissatullu pilersaarussiaq naatsorsuutigineqarpoq AC fuldmægtigisut atorfillip ukiumut suliarisinnaasaanik ataatsimik naleqassasoq, tassa 500.000 kr. missaannik.

### **Namminersortunut aningaasatigut allaffissornikkullu kingunerisassai:**

Soqanngilaq.

### **Innuttaasunut aningaasatigut allaffissornikkullu kingunerisassai:**

---

<sup>2</sup> Naalackersuisut innarluutilinnut tunngasut killiffiat pillugu nassuiaataat (juli 2016) s.ass. imaqarpoq kapitalimik ataatsimik (Kap. 7) innarluutilinnik sullissisut suliamik ilinniagaqarsimasut ilinniagaqarsimannngitsullu pillugit, tamatumalu qanoq kivinneqarsinnaanerannut tunngasunik.

Naalackersuisut "Ilinniartitaanermut pilersaarutaat II" 2015-imiilli isumaginninnermut tunngasuni ilinniartitaanermut suliniutinik immikkoortoqartarpoq, tasanilu ilaatigut innarluutilinnik sullissisut ilinniartitaanerannik kivitsinissaq sammineqartarluni.

Soqanngilaq.